

Рўйхат рақами 393

“ТАСДИҚЛАНГАН”
АТБ “Қишлоқ қурилиш банк”
Бошқарувининг
2022 йил “23” сентябр даги
32 - сонли қарори билан

Бошқаруви Раиси



А.А. Муратов

АТБ “Қишлоқ қурилиш банк” тизимида хотин-қизлар
масалалари бўйича бошланғич ташкилоти тўғрисида

НИЗОМ

(“23” сентябр 2022 йилдан кучга киради)

Тошкент – 2022 йил

**АТБ “Қишлоқ қурилиш банк” тизимида хотин-қизлар
масалалари бўйича бошланғич ташкилоти тўғрисида низом**

1-боб. Умумий қоидалар

1. Ушбу Низом Ўзбекистон Республикаси Президентининг 2022 йил 7 мартдаги “Оила ва хотин қизларни тизимли қўллаб-қувватлашга доир ишларни янада жадаллаштириш чора-тадбирлари тўғрисида”ги ПФ-87-сонли Фармони, АТБ “Қишлоқ қурилиш банк” Устави ва бошқа норматив-ҳуқуқий ҳужжатлар талабларига мувофиқ ишлаб чиқилган бўлиб, АТБ “Қишлоқ қурилиш банк” (кейинги ўринларда – банк) тизимида меҳнат жамоаларининг хотин-қизлар масалалари бўйича бошланғич ташкилотининг (кейинги ўринларда – бошланғич ташкилот) асосий вазифалари ва функциялари, ҳуқуқ ва мажбуриятларини, шунингдек фаолиятини ташкил этиш тартибини белгилайди.

2. Бошланғич ташкилот хотин-қизларга оид давлат сиёсатини амалга оширишда банкнинг хотин-қизлар масалалари бўйича барча меҳнат жамоалари фаолиятини мувофиқлаштирувчи коллегиял орган ҳисобланади.

3. Бошланғич ташкилот банкда ва унинг ҳудудий таркибий бўлинмаларида фаолият олиб бораётган хотин-қизларни ихтиёрийлик асосида бирлаштиради, шу билан бирга жамоатчилик асосида фаолият юритади.

4. Бошланғич ташкилот ўз фаолиятини Ўзбекистон Республикаси Конституцияси ва қонунлари, Ўзбекистон Республикаси Олий Мажлиси палаталарининг қарорлари, Ўзбекистон Республикаси Президентининг фармонлари, қарорлари ва фармойишлари, Ўзбекистон Республикаси Вазирлар Маҳкамасининг қарорлари ва фармойишларига, шунингдек мазкур Низомга мувофиқ олиб боради.

2-боб. Бошланғич ташкилотни ташкил этиш ва унинг тузилиши

5. Бошланғич ташкилот меҳнат жамоаларида 18 ёшдан катта бўлган хотин-қизларни сони 5 нафардан кам бўлмаган тақдирда ташкил этилади. Меҳнат жамоасида 5 нафардан кам бўлган таркибий бўлинмаларда фаолият кўрсатаётган хотин-қизлар юқори турувчи ташкилотнинг бошланғич ташкилотига қўшилади.

6. Банкда ва унинг ҳудудий таркибий бўлинмаларида хотин-қизлар масалалари бўйича бошланғич ташкилотни тузиш ҳақидаги қарор меҳнат жамоасидаги хотин-қизларнинг йиғилишида овоз бериш орқали қабул қилинади ва бу ҳақда тегишлилиги бўйича Ўзбекистон Республикаси Оила ва хотин-қизлар давлат қўмитаси, Қорақалпоғистон Республикаси Оила ва хотин-қизлар қўмитаси, вилоятлар ва Тошкент шаҳар оила ва хотин-қизлар бошқармалари, туманлар (шаҳарлар) оила ва хотин-қизлар бўлимларига ҳамда ташкилотнинг юқори турувчи органига хабар қилинади.

7. Бошланғич ташкилотни ташкил этиш тўғрисидаги қарор тегишлилиги бўйича Ўзбекистон Республикаси Оила ва хотин-қизлар давлат қўмитаси, Қорақалпоғистон Республикаси Оила ва хотин-қизлар қўмитаси, вилоятлар ва Тошкент шаҳар оила ва хотин-қизлар бошқармалари, туман (шаҳар) оила ва хотин-қизлар бўлимларида рўйхатга олинади.

3-боб. Бошланғич ташкилотнинг асосий вазифалари ва функциялари

8. Бошланғич ташкилот меҳнат жамоаларида фаолият юритаётган хотин-қизларни ҳар томонлама қўллаб-қувватлаш, ижтимоий-иқтисодий аҳволи ва меҳнат шaroитларини

яхшилаш, ҳуқуқ ва манфаатларини ҳимоя қилиш, миллий ва маънавий қадриятларимизга асосланган ҳолда оила муносабатларини мустаҳкамлаш, соғлом турмуш тарзини шакллантириш, хотин-қизларнинг маънавиятини юксалтириш мақсадида тузилади.

9. Қуйидагилар бошланғич ташкилотининг асосий вазифалари ҳисобланади:

Оила ва хотин-қизлар давлат қўмитасига юкланган вазифаларни амалга оширишда яқиндан қўмаклашиш;

хотин-қизларга оид давлат сиёсатини амалга оширишда иштирок этувчи давлат органлари ва муассасалари фаолиятига қўмаклашиш;

Ўзбекистон Республикаси Президенти ҳамда Ҳукуматнинг ҳужжатларида соҳага оид белгиланган талабларни ҳаётга тўлақонли жорий этиш.

10. Бошланғич ташкилот ўзига юклатилган вазифаларни бажариш учун қуйидаги функцияларни амалга оширади:

а) Оила ва хотин-қизлар давлат қўмитасига юкланган вазифаларни амалга оширишда яқиндан қўмаклашиш соҳасида:

Оила ва хотин-қизлар давлат қўмитасини хотин-қизларнинг қўмакчиси ва таянчига айлантиришда ҳисса қўшиш;

Оила ва хотин-қизлар давлат қўмитаси фаолиятини самарали йўлга қўйишга доир тавсиялар бериш, хотин-қизларга оид давлат сиёсатини амалга ошириш жараёнида вужудга келаётган муаммо ва йўл қўйилаётган камчиликларни бартараф этишда қўмаклашиш;

давлат органлари ва муассасалари, жумладан Оила ва хотин-қизлар давлат қўмитасининг муассасалари, нодавлат нотижорат ташкилотлари, шунингдек, фуқаролик жамиятининг бошқа институтлари томонидан ўтказиладиган тадбирлар, анжуманларда иштирок этиш;

хотин-қизлар муаммолари ва ташаббусларини ўрганиш;

хотин-қизларнинг меҳнат шaroитларини яхшилаш, аёлларга нисбатан меҳнат қонунчилигида белгиланган имтиёз ва кафолатларни амалга оширишда қўмаклашиш;

Оила ва хотин-қизлар давлат қўмитаси фаолияти борасида кенг жамоатчилик фикрини ўрганиш, таҳлил қилиш, ушбу соҳадаги ишларни янада такомиллаштиришга доир таклифлар ишлаб чиқиш;

б) хотин-қизларга оид давлат сиёсатини амалга оширишда иштирок этувчи давлат органлари ва муассасалари фаолиятига қўмаклашиш соҳасида:

давлат органлари ва муассасалари, нодавлат нотижорат ташкилотлари, шунингдек, фуқаролик жамиятининг бошқа институтлари билан хотин-қизларга оид давлат сиёсатини амалга оширишда ҳамкорлик қилиш;

хотин-қизларни давлат томонидан ҳар томонлама қўллаб-қувватлаш соҳасидаги ислохотларни хотин-қизларга доимий равишда етказиб бориш;

хотин-қизларни ҳар томонлама қўллаб-қувватлаш, улар учун муносиб меҳнат шaroитларини яратилишига қўмаклашиш;

хотин-қизларни маънавий-ахлоқий жиҳатдан тарбиялашга доир тадбирларни ташкил этиш;

миллий ва маънавий қадриятларимизга асосланган ҳолда оила муносабатларини мустаҳкамлаш, хотин-қизлар ўртасида салбий ҳолатларнинг олдини олиш, уларнинг маънавиятини юксалтириш;

хотин-қизларнинг ҳуқуқлари, эркинликлари ва қонуний манфаатларини ҳимоя қилишга, уларнинг жамият ҳаётидаги роли ва фаоллигини оширишга, соғлом ва баркамол

ёш авлодни тарбиялашга, оилада маънавий-ахлоқий муҳитни шакллантиришга йўналтирилган чора-тадбирларни ташкил этиш;

хотин-қизларнинг ижтимоий-сиёсий фаоллиги, ҳуқуқий билимлари ва маданиятини ошириш, ҳуқуқ ва манфаатларини ҳимоя қилиш, муаммоларини ўрганиш ва бартараф этишга кўмаклашиш;

оилаларни мустаҳкамлашга оид хотин-қизлар масалаларида таълим муассасалари ва бошқа тегишли ташкилотлар билан ҳамкорлик қилиш;

хотин-қизларга миллий ўзлик, инсонпарварлик анъаналарига садоқат ғояларини сингдириш, улар ўртасида радикализм ва экстремизмнинг ёт ғояларига қарши иммунитетни мустаҳкамлаш борасида маърифий ишларни амалга ошириш;

хотин-қизлар ўртасида жисмоний тарбия ва спортни ривожлантириш, спортга кизиқишни рағбатлантириш чора-тадбирларини амалга ошириш;

хотин-қизлар ўртасида санитария-гигиенага оид ва соғлом турмуш тарзини шакллантириш бўйича тарғибот ишларини ташкил этиш;

хотин-қизлар таълими ва тарбияси сифатини ошириш, ўқув жараёнига таълимнинг замонавий шакллари ва усуллари жорий этиш чораларини кўриш;

хотин-қизларнинг касбий салоҳиятини ошириб бориши учун шарт-шароитларни яратиш, семинарлар ташкил этиш;

хотин-қизлар ўртасида ўқув, ахборот, маънавий-маърифий, маданий ва бошқа тадбирларни ташкил этиш ва ўтказиш;

тегишли давлат ва жамоат ташкилотлари билан биргаликда аёлларга нисбатан тазйик ва зўравонликка қарши курашиш чора-тадбирларини амалга ошириш.

в) Ўзбекистон Республикаси Президенти ҳамда Ҳукуматнинг ҳужжатларида соҳага оид белгиланган талабларни ҳаётга тўлақонли жорий этиш соҳасида:

хотин-қизларга оид давлат сиёсати соҳасидаги давлат дастурларининг ишлаб чиқилишида ва амалга оширилишида иштирок этиш;

хотин-қизларга оид давлат сиёсати соҳасидаги қонун ҳужжатларининг ижро этилиши юзасидан жамоатчилик назоратини амалга ошириш.

4-боб. Бошлангич ташкилотнинг ҳуқуқ ва мажбуриятлари

11. Бошлангич ташкилот қуйидаги ҳуқуқларга эга:

мазкур Низом тамойилларига зид бўлмаган ўз ваколат доирасидаги қарорларни қабул қилиш;

ўз ваколатига кирадиган масалалар бўйича давлат органлари ва муассасалари, нодавлат нотижорат ташкилотлари ва фуқаролик жамиятининг бошқа институтларидан белгиланган тартибда маълумотларни сўраш ва олиш;

давлат органлари ва муассасаларининг хотин-қизларга оид давлат сиёсатини амалга ошириш билан боғлиқ фаолияти самарадорлигини оширишга доир таклифлар ишлаб чиқиш;

Ўзбекистон Республикаси Оила ва хотин-қизлар давлат кўмитаси ва унинг ҳудудий бўлинмалари томонидан ўтказиладиган тадбир ва ўқув семинарларга ўз вакиллари юбориш;

жамият ва давлат ҳаётида фаоллик ва ташаббускорлик кўрсатган, ўзининг самарали меҳнати билан оналик ва болалик муҳофазасига муносиб ҳисса қўшган, шунингдек, соғлом ва баркамол авлодни вояга етказиш, уларни ватанпарварлик руҳида тарбиялаш, жойларда маънавий-ахлоқий муҳитни соғломлаштириш борасида

ибратли фаолият олиб бораётган хотин-қизларни белгиланган тартибда “Мўътабар аёл” кўкрак нишонига тавсия этиш;

хотин-қизларга оид давлат сиёсатини амалга оширишда фаол ва ташаббускор хотин-қизларни рағбатлантириш, жамоат ишларига жалб этиш, шунингдек, уларни ўрнатилган тартибда раҳбарлик лавозимларига тавсия этиш;

уларнинг ҳуқуқ ва қонуний манфаатларини ҳимоя қилишга қаратилган таклифлар ишлаб чиқиш ва раҳбариятга киритиш;

Ўзбекистан Республикаси “Хотин-қизлар ва эркалар учун тенг ҳуқуқ ҳамда имкониятлар кафолатлари тўғрисида”ги Қонун талаблари ижроси устидан назоратни амалга ошириш;

бошланғич ташкилот қонун ҳужжатларига мувофиқ бошқа ҳуқуқларга ҳам эга бўлиши мумкин.

Жамоатчилик асосида ишлаётган аёллар кенгаши раиси ва аъзолари ҳар чоракда меҳнатга ҳақ тўлишнинг энг кам миқдорининг уч баравари миқдорида рағбатлантирилиши мумкин.

12. Бошланғич ташкилот зиммасига юклатилган вазифалар ва функцияларнинг самарали бажарилиши учун масъул ҳисобланади.

5-боб. Бошланғич ташкилот фаолиятининг асосий тамойиллари

13. Бошланғич ташкилот ўз фаолиятини қуйидаги тамойиллар асосида олиб боради: бошланғич ташкилот раҳбар органларининг сайланиши;

бошланғич ташкилот сайлаб қўйиладиган раҳбар органларининг юқори турувчи органи ҳамда тегишлилиги бўйича Оила ва хотин-қизлар давлат қўмитаси ва унинг ҳудудий бўлинмаларига ҳисобот бериши;

бошланғич ташкилот ва унинг сайлаб қўйиладиган органлари ишида коллегиялик, ошкоралик;

қарорлар қабул қилиш чоғида мунозара эркинлиги ва қабул қилингандан кейин сўзсиз бажарилишини таъминланиши.

6-боб. Бошланғич ташкилотнинг раҳбар органлари

14. Бошланғич ташкилотнинг раҳбар органлари:

умумий йиғилиш;

аёллар кенгаши.

15. Раҳбар органларининг мақоми қуйидагича белгиланади:

умумий йиғилиш – меҳнат жамоасидаги хотин-қизларнинг йиғилиши, бошланғич ташкилотнинг олий органи;

аёллар кенгаши – бошланғич ташкилот фаолиятига раҳбарликни амалга оширувчи коллегиял ижроия органи;

аёллар кенгаши раиси бошланғич ташкилот раиси ҳисобланади, бошланғич ташкилот номидан иш кўради, бир вақтнинг ўзида умумий йиғилиш раиси ҳам ҳисобланади.

16. Умумий йиғилиш:

бошланғич ташкилотнинг умумий йиғилишлари уларнинг ишида ўз аъзоларининг ярмидан кўпи иштирок этган тақдирда ҳуқуқли ҳисобланади;

бошланғич ташкилот умумий йиғилиши қарорлари уларда қатнашаётган йиғилиш иштирокчиларининг ярмидан кўпи ёқлаб овоз бергандагина қабул қилинган ҳисобланади;

овоз бериш усули (очик ёки ёпик тарзда) тегишли умумий йиғилиш иштирокчилари томонидан белгиланади.

17. Бошланғич ташкилотнинг умумий йиғилишида муҳокама этилган масалалар юзасидан қарорлар қабул қилинади ва натижалари бўйича баённомалар расмийлаштирилади.

18. Бошланғич ташкилот умумий йиғилишининг чақирилиши тўғрисида камида 10 (ўн) кун олдин эълон қилинади ва унда умумий йиғилиш муддати, жойи, кун тартиби кўрсатилади.

19. Бошланғич ташкилотнинг зарур ҳоллардаги навбатдан ташқари умумий йиғилиши ўз аъзоларининг ташаббусига биноан, бошланғич ташкилот аъзоларининг камида учдан бир қисмининг талабига кўра чақирилади.

20. Бошланғич ташкилот умумий йиғилишининг ваколатлари:

аёллар кенгаши сон таркибини белгилаш ҳамда аёллар кенгаши раиси (бошланғич ташкилот раиси) ва аъзоларини 3 (уч) йил муддатга сайлаш;

бошланғич ташкилотнинг фаолияти тўғрисидаги ҳисоботларини эшитиш;

мазкур Низом ва бошқа амалдаги қонунчилик ҳужжатлари доирасида бошланғич ташкилот аъзоларининг ҳуқуқ ва қонуний манфаатларига оид масалаларда қарор қабул қилиш;

аёллар кенгашининг аъзолари фаолиятини давом эттира олмаган (бошқа ишга ўтиб кетиши ёки бошқа сабабларга кўра) тақдирда 2 (икки) ҳафта муддатда кенгаш таркибини тўлдириш ва янги аъзоларни сайлаш бўйича умумий йиғилиш ўтказилади.

21. Уч йиллик сайланган муддати тугаганидан сўнг, бошланғич ташкилот органларининг ваколоти тугаган ҳисобланади.

Ваколат муддати тугаганидан сўнг, аъзолар ташаббуси билан умумий йиғилиш ўтказилиб, қайта сайлов ўтказиши лозим.

Қайта сайловларни ўтказиш форс-мажор ҳолатларида ёки қонунчиликда белгиланган бошқа чекловлар жорий қилинганда маълум бир муддатга кечиктирилиши мумкин.

22. Аёллар кенгаши:

аёллар кенгаши бошланғич ташкилотнинг сайлаб қўйиладиган коллегиял ижроия органи ҳисобланиб, бошланғич ташкилот фаолиятига жорий раҳбарликни амалга оширади;

аёллар кенгаши таркибига лавозимидан қатъий назар бошланғич ташкилотнинг фаол, обрўли аъзолари орасидан 3-7 нафар таркибда хотин-қизлари сайланади;

аёллар кенгаши йиғилиши заруриятга қараб, аммо ҳар чоракда камида бир маротаба ўтказилади;

аёллар кенгаши йиғилишларини унинг раиси, у йўқ бўлган ҳолларда унинг аъзоларидан бири олиб боради;

аёллар кенгашининг ваколат муддати 3 (уч) йил;

аёллар кенгаши ҳужжатлари йиғилиш баёни шаклида қабул қилинади.

23. Аёллар кенгаши ваколатига қуйидагилар киради:

мазкур Низомда белгиланган вазифаларни ва умумий йиғилишнинг қарорларини бажариш бўйича фаолиятни амалга ошириш;

хотин-қизларнинг ижтимоий-меҳнат ҳуқуқларига алоқадор, жумладан, бандлик, меҳнат муносабатларини тартибга солиш, иш ҳақи, меҳнат шароити, хотин-қизларнинг меҳнат ҳуқуқларини, саломатлигини муҳофаза қилиш, уй-жой ва маиший турмуш шароити, маданий хизмат кўрсатиш, хотин-қизларнинг ижтимоий кафолатлари каби масалалар бўйича таклифларни ишлаб чиқади ҳамда уларни қонунларда ва бошқа норматив-ҳуқуқий ҳужжатларда мустаҳкамлаш юзасидан таклифлар ишлаб чиқиш;

хотин-қизларга оид масалалар юзасидан тегишлиги бўйича Ўзбекистон Республикаси Оила ва хотин-қизлар давлат қўмитаси ва унинг ҳудудий бўлинмаларига, шунингдек Хотин-қизларнинг жамиятдаги ролини ошириш, гендер тенглик ва оила масалалари бўйича республика ва ҳудудий комиссияларга мурожаат қилиш, таклифлар киритиш;

соҳага оид хорижий тажрибаларни ўрганиб бориш;

қонунчиликда бошланғич ташкилотга бериладиган ҳуқуқларни амалга ошириш;

ўз фаолияти тўғрисида оммавий ахборот воситалари орқали жамоатчиликни хабардор қилиш;

бошланғич ташкилот раиси ўз хоҳишига кўра ёки бошқа ишга ўтганлиги сабабли лавозимидан озод этиш ҳақида ариза берган тақдирда ёки саломатлиги ёмонлашгани туфайли ўз вазифаларини бажара олмай қолган ҳолларда умумий йиғилишлар оралиғида бошланғич ташкилот раисини лавозимидан озод қилиш;

умумий йиғилишлар оралиғидаги даврда бошланғич ташкилот раиси лавозимидан озод этилган ҳолларда, умумий йиғилиш ўтказилгунига қадар бошланғич ташкилот раиси вазифасини бажаришни унинг аъзоларидан бирига юклаш тўғрисида қарор қабул қилиш;

хотин-қизларнинг ижтимоий-меҳнат ҳуқуқлари ва манфаатларига доир масалаларни қонунлар ва бошқа норматив-ҳуқуқий ҳужжатларда мустаҳкамлаб қуйиш юзасидан таклифлар ишлаб чиқиш;

ижтимоий-иқтисодий дастурларнинг ишлаб чиқилиши ва амалга оширилишида иштирок этиш, бошланғич ташкилот фаолиятига доир муҳим масалалар бўйича қарорлар, баёлотлар, мурожаатномалар қабул қилиш;

бошланғич ташкилот аъзолари ва фаолларини рағбатлантириш тўғрисида қарорлар қабул қилиш;

бошланғич ташкилот иш режасини тасдиқлаш.

Аёллар кенгаши қонунчилик ҳужжатлари ва ушбу Низомга мувофиқ бошқа ваколатларга эга бўлиши мумкин.

24. Бошланғич ташкилот раиси:

ушбу Низом ва раҳбар органлар қарорига мувофиқ берилган ваколатлар доирасида бошланғич ташкилот номидан иш кўради;

умумий йиғилиш томонидан 3 (уч) йил муддатга сайланади;

ушбу Низом бўйича вазифаларни, шунингдек, раҳбар органлари қарорларининг бажарилишини ташкил этади ва уларнинг олдида ҳисобдордир;

давлат ва хўжалик бошқарув органларининг, иш берувчиларнинг очиқ ҳайъат мажлисларида бошланғич ташкилот номидан иштирок этади;

умумий йиғилиш ва аёллар кенгаши йиғилишларини ўтказиши;

аёллар кенгаши йиғилишини чақиради, муҳокама қилинадиган масалалар юзасидан материаллар тайёрланишини ташкиллаштириши, йиғилишга масалаларни киритади, қабул қилинган қарорлар ижросини таъминлайди ва назорат қилади;

умумий йиғилиш ва аёллар кенгаши йиғилиши баёнларини имзолайди.

7-боб. Бошланғич ташкилот фаолияти сарҳисоби ва ахборот бериш тартиби

25. Бошланғич ташкилот ўз фаолиятининг натижалари ҳисобини олиб боради ва белгиланган тартибда ҳар чорак якунларида ҳисоботларни тегишлилиги бўйича ўз раҳбарияти, Оила ва хотин-қизлар давлат қўмитаси ва унинг ҳудудий бўлинмаларига ҳамда юқори турувчи органига тақдим этади.

8-боб. Бошланғич ташкилотни тугатиш ёки қайта ташкил этиш тартиби

26. Бошланғич ташкилотни қайта ташкил этиш ёки тугатиш бошланғич ташкилотнинг умумий йиғилиши қарорига асосан амалга оширилади.

27. Бошланғич ташкилот қайта ташкил этилганда умумий йиғилиш унинг ҳуқуқий ворисини белгилайди.

АТБ “Қишлоқ қурилиш банк”
Аёллар кенгаши раиси

 Д.Мўминова

Ички меъёрий ҳужжатларни кўриб чиқиш бўйича эксперт гуруҳи:

К.Исмоилий

А.Атажанов

Э.Атабаев

Г.Джаббаров

А.Қодиров

К.Яхшиев

Р.Бойназаров

Ш.Лафасов

Ш.Очилов

2022 йил 23 сентябрь

Тошкент шаҳри

ЮРИДИК ХУЛОСА

Юридик департамент томонидан АТБ “Қишлоқ қурилиш банк” тизимида хотин-қизлар масалалари бўйича бошланғич ташкилоти тўғрисидаги низом лойиҳаси ҳуқуқий экспертизадан ўтказилди.

Ушбу низом лойиҳаси Ўзбекистон Республикаси Президентининг 2022 йил 7 мартдаги “Оила ва хотин-қизларни тизимли қўллаб-қувватлашга доир ишларни янада жадаллаштириш чора-тадбирлари тўғрисида”ги ПФ-87-сонли Фармони, АТБ “Қишлоқ қурилиш банк” Устави ҳамда бошқа норматив-ҳуқуқий ҳужжатлар талабларига мувофиқ ишлаб чиқилган бўлиб, АТБ “Қишлоқ қурилиш банк” тизимида меҳнат жамоаларининг хотин-қизлар масалалари бўйича бошланғич ташкилотининг асосий вазифалари ва функциялари, ҳуқуқ ва мажбуриятларини, шунингдек фаолиятини ташкил этиш тартибини белгилайди.

Мазкур ички норматив ҳужжат лойиҳасини тасдиқлаш “АТБ “Қишлоқ қурилиш банк” Бошқаруви тўғрисида”ги низомига мувофиқ банк Бошқаруви ваколатига киради.

Юридик департамент
бошлиғи

 Б. Джумаев

Aksiyadorlik tijorat banki

Qishloq qurilish bank

BOSHQARUVI QARORIDAN KO'CHIRMA

2022 yil 23 sentabr №32

Toshkent sh.

13. АТБ “Қишлоқ қурилиш банк”нинг айрим ички меъёрий ҳужжатларини тасдиқлаш тўғрисида

Р.Тохтаев, Д.Муминова, А.Маликов, Х.Махмудов, Бошқарув аъзолари

БОШҚАРУВ ҚАРОР ҚИЛАДИ:

1. Кун тартибидаги масала юзасидан Банк маҳсулотларини ишлаб чиқиш ва ривожлантириш департаменти (А.Маликов), Бухгалтерия ҳисоби ва ҳисоботи департаменти (Х.Махмудов), Санкциявий комплаенс хизмати (Р.Тохтаев), Банк Аёллар кенгаши (Д.Муминова)нинг ахбороти маълумот учун қабул қилинсин.

2. Банк Бошқаруви муҳокамасига киритилган қуйидаги ички меъёрий ҳужжатлар:

- “АТБ “Қишлоқ қурилиш банк” тизимида хотин-қизлар масалалари бўйича бошланғич ташкилоти тўғрисида Низом”;

6. Мазкур қарорнинг ижросини назорат қилиш Бошқарув раиси ўринбосари К.Исмоилий ва Чакана бизнес бўйича бош директор А.Атажанов зиммасига юклатилсин.

Бошқарув раиси

А.Муратов

Бошқарув котиби

А.Абдуллаев

